



Caderno da crítica

Cuestionario Proust: Alfonso Álvarez Cáccamo

[Ramón Nicolás](#) 26 de Decembro de 2013

<https://cadernodacritica.wordpress.com/2013/12/26/cuestionario-proust-alfonso-alvarez-caccamo/>

1.– Principal trazo do seu carácter?

– Son optimista pero cos pés na terra. Sinto curiosidade por todo. Góstame aprender, e sinto unha enorme satisfacción cando aprendo e comprendo, especialmente no eido da Historia.

2.– Que calidade aprecia máis nas persoas?

– A fidelidade e a xenerosidade.

3.– Que agarda das súas amizades?

– O mesmo que eu tento dar: un trato comprensivo e xeneroso.

4.– A súa principal eiva?

– Teño moitas. Non sei dicir cal é a máis notábel. Quizais a dificultade para comprender a Física, a Astrofísica e as Matemáticas

5.– A súa ocupación favorita?

– Ler, pintar ao óleo e tocar o piano.

6.– O seu ideal de felicidade?

– Polo que atinxe á miña persoa, manterme en aceptábeis condicións mentais e físicas, nesa orde. Polo que atinxe ao mundo, que se cumpran definitivamente, catro séculos despois, as tres máximas da Revolución Francesa: igualdade, fraternidade e legalidade.

7.– Cal sería a súa maior desgraza?

– Enviuvar.

8.– Que lle gustaría ser?

– Xa son maior para ser outra cousa, pero se volvese nacer, cousa que vexo difícil, o meu soño sería ser director de orquestra, compositor e un pianista capaz de interpretar con mestría, e para propio goce, todas as partituras dos clásicos.

9.– En que país desexaría vivir?

– Nunha Galiza dona do seu destino.

10.– A súa cor favorita?

– Anil.

11. – A flor que máis lle gusta?

– A gardenia.

12.– O paxaro que prefire?

– O papagaio.

13.– A súa devoción na prosa?

– Valle Inclán, Méndez Ferrín, Cunqueiro, Torrente Ballester, García Márquez, Dostoievski,

Tomás Mann, Irene Nemirovsky... Imposíbel citar un só autor/a.

14.– E na poesía?

– Xosé María Álvarez Cáccamo, Xavier R. Baixeras, Xosé María Álvarez Blázquez, Celso Emilio Ferreiro, Rosalía de Castro, Baudelaire... Imposíbel citar un só autor/a.

15.– Un libro?

– Dificilísimo quedar cun só libro. Quizais *Crime e castigo*.

16.– Un heroe de ficción?

– Asterix.

17.– Unha heroína?

– Pipi Calzaslargas.

18.– A súa música favorita?

– Beethoven

19.– Na pintura?

– Edouard Manet entre moitos outros/as.

20.– Un heroe ou heroína na vida real?

– Alexandre Bóveda.

21.– O seu nome favorito?

– Non teño un nome favorito. Os nomes favoritos veñen dados polas persoas favoritas que os leven.

22.– Que hábito alleo non soporta?

– A desorde.

23.– O que máis odia?

– O egoísmo e a prepotencia.

24.– A figura histórica que máis despreza?

– Franco, Videla, Pinochet, Hitler...

25.– Un feito militar que admire?

– A resistencia de Stalingrado.

26.– Que don natural lle gustaría ter?

– Nos sentidos, unha boa vista. Na forma de ser, a capacidade de transmitir acougo aos demais.

27. – De que maneira lle gustaría morrer?

– Sen sufrimento, entre a xente amada.

28.– Cal é o seu estado de ánimo máis habitual?

– Ilusionado por facer cousas.

29.– Que defectos lle inspiran máis indulxencia?

– Os excesos dos larpeiros. A indecisión en aspectos superficiais.

30.– Un lema na súa vida?

– Tentar ser feliz.